

Oktòb 2011

konferans jeneral

Liv Mòmmon an-yon liv ki soti nan Bondye

Liv Mòmmon

Bib

temwayaj

konferans jeneral

Liv Mòmmon an-yon liv ki soti nan Bondye

Pa ÈLdè Tad R. Callister

Nan Prezidans Swasanndis yo

Ansanm avèk Bib la, Liv Mòmmon an se yon temwen endispansab nan doktrin Kris la ak divinite li.

Sa gen kèk ane, aryè gran papa mwen te tonbe sou yon kopi Liv Mòmmon an pou la premyè fwa. Li te louvri l nan mitan epi l te li kèk paj. Epi li te deklare: “Liv sa a ekri oubyen pa Bondye, oubyen pa dyab la, e mwen pral chèche dekouvri kiyès ki ekri li.” Li te li l de fwa soti nan premye rive nan dènye paj pandan dis pwochen jou yo epi li te deklare: “Dyab la pa t ap ka ekri li; donk, se nan Bondye l soti.”¹

Sa se jeni Liv Mòmmon an, pa gen demi mezi. Oubyen se pawòl Bondye jan l deklare a oubyen li se yon frod total. Liv sa a pa senpleman deklare ke li se yon trete moral oubyen yon kòmantè teyolojik oubyen ankò yon koleksyon ekriti ki la pou eklere moun. Li deklare ke li se pawòl Bondye, chak fraz, chak vèsè, chak paj. Joseph Smith te deklare ke yon anj Bondye te dirije l

kote plak lò yo, ki te gen bagay pwofèt ki nan Amerik tan lontan yo te ekri, e li te tradui plak sa yo pouwa diven. Si istwa sa a vrè, konnen Liv Mòmòn an se ekriti sen, jan li di li ye a; si se pa sa, se yon kanila byen elabore men kanmèm dyabolik.

C.S. Lewis te pale de yon dilèm menm jan yon moun te rankontre kote li te dwe chwazi pou l swa asepte swa rejte divinite Sovè a, kote pa t sanble te gen demimezi tou: “M ap eseye la a pou m pa kite okenn moun di bagay vrèman ensanse ke moun di souvan de Li a: ‘Mwen pare pou m asepte Jezi kòm yon gran pwofesè moral, men m pa asepte lè L di Li se Bondye a.’ Sa se yon bagay nou pa dwe di. Yon nonm ki te senpleman yon nonm e ki ta di kalite bagay Jezi te di yo pa t ap yon gran pwofesè moral. Nou dwe fè chwa nou. Swa nonm sa a se te, e se sa l ye, Pitit Gason Bondye a; swa li se yon moun fou oubyen yon bagay pi mal ankò. Men annou pa vini avèk okenn nonsans degradan ki di Li se yon gran pwofesè imen an. Li pa kite opsyon sa a pou nou. Li pa t gen entansyon fè sa.”²

Menm jan tou, nou dwe fè yon chwa senp osijè Liv Mòmòn an: swa l soti nan Bondye swa l soti nan dyab la. Pa gen lòt opsyon. Pandan yon ti moman, m ap envite nou fè yon tès ki ap ede nou detèmine vrè nati liv sa a. Mande tèt nou si ekriti sa yo ki nan nan Liv Mòmòn an rapwoche nou plis de Bondye oubyen de dyab la:

“Fè yon festen ak pawòl Kris la; paske, gade, pawòl Kris yo ap di nou tout bagay nou dwe fè” (2 Nefi 32:3).

Oubyen pawòl sa yo yon papa eman te di pitit gason l yo: “Epi kounyeya, pitit gason m yo, sonje, sonje se sou wòch Redanmtè nou an, ki se Kris la, Pitit Gason Bondye a, nou dwe bati fondasyon nou.” (Elaman 5:12).

Oubyen pawòl sa yo yon pwofèt te di: “Vin jwenn Kris la, e pèfeksyone nou nan li” (Mowoni 10:32).

Èske dyab la ta ka posibman otè deklarasyon sa yo ki nan Liv Mòmmon an? Lè Sovè a te fin chase kèk demon, Farizyen yo te deklare ke Li te fè sa “pa pouvwa Belzebout, prens demon yo.” Sovè a te reponn pou di yon konklizyon konsa pa gen sans: Li te di “tout wayòm ki divize kont tèt li gen pou l kraze; e tout kay ki divize kont tèt li gen pou l kraze.” Epi apre sa konklizyon final li a: “*E si Satan chase Satan, li divize kont pwòp tèt li; kijan pou wayòm li an ta fè ret kanpe?*” (Matye 12:24-26 italik ajoute)

Si ekriti mwen sot site la yo ki soti nan Liv Mòmmon an anseye nou pou nou adore ak renmen ak sèvi Sovè a (e se sa yo fè), kijan yo ta fè soti nan dyab la? Si se te sa, li tap divize kont pwòp tèt li e konsa li tap detwi pwòp wayòm li an, egzakteman kondisyon Senyè te di ki pa tap kapab egziste a. Yon lekti onèt Liv Mòmmon an, ap kondi yon moun nan menm konklizyon ak gran-gran-papa m nan, sa vle di: “Dyab la pa ta kapab ekri l; li soti nan Bondye.”

Men poukisa Liv Mòmman an enpòtan konsa si nou déjà gen Bib la pou aprann nou bagay sou Jezikri? Èske nou janm mande tèt nou poukisa gen si anpil legliz Kretyen nan mond lan jodi a, kote yo jwenn doktrin yo esansyèlman soti nan menm Bib la? Se paske yo entèprete Bib la diferaman. Si yo te entèprete l menm jan, yo tap menm legliz la. Sa se pa yon kondisyon Senyè vle, paske Apot Pòl te di gen “yon sèl Senyè, yon sèl lafwa, yon sèl batèm” (Efezyen 4:5). Pou ede inite sa a reyalize, Senyè a te tabli yon lwa divin konsènan temwen. Pòl te anseye: “Tout bagay va regle sou depozisyon de osinon twa temwen” (2 Korentyen 13:1).

Bib la se yon temwen Jezkiri; Liv Mòmmon an se yon lòt. Poukisa dezyèm temwen sa a si enpòtan konsa? Ilistasyon m pral fè la a kapab ede nou: Konbyen liy dwat nou kapab trase soti nan yon sèl pwèn sou yon moso papye? Repons lan se enfini. Pandan yon ti moman, sipoze ke grenn pwèn sa a reprezante Bib la epi bann liy dwat sa yo ki pase atravè pwèn sa a reprezante bann entèpretasyon diferan Bib la epi chak entèpretasyon sa yo reprezante yon legliz diferan.

Men, kisa k ap pase si sou moso papye sa a gen yon dezyèm pwèn ki reprezante Liv Mòmòn an? Konbyen ling dwat nou ta kapab trase ant de pwèn referans sa yo, Bib la ak Liv Mòmòn an? Yon sèl. Yon sèl entèpretasyon doktrin Kris la kapab egziste nan temwayaj de temwen sa yo.

Ankò e ankò Liv Mòmòn an aji kòm yon temwen ki ap konfime, klarifye, inifye doktrin yo anseye nan Bib la pou ka gen “yon sèl Senyè, yon sèl lafwa, yon sèl batèm” nan. Pa egzanp, gen kèk moun ki nan konfizyon pou konnen si batèm endispensab pou Sali menm si Sovè a te di Nikodèm: “Pèsonn pa ka antre nan wayòm syèl la si li pa fèt nan dl oak nan Sentespri” (Jan 3:5) Sepandan, Liv Mòmòn an elimine tout dout sou sijè sa a: “Epi li kòmande tout moun pou yo repanti, e pou yo batize nan non l ... san sa yo p kapab sove nan wayòm Bondye a” (2 Nefi 9:23)

Gen plizyè kalite mòd batèm nan mond lan jodi a menm si Bib la di nou fason Sovè a, gwo Egzanp nou an, te batize: “[Li] te soti nan dlo a” (Matye 3:16). Èske li ta kapab soti nan dlo a si anvan sa li pat anndan dlo a? Pou pa gen okenn diskòd sou sijè sa a, Liv Mòmòn an chase posiblite sa a avèk deklarasyon dirèk doktrin ki konsène fason kòrèk batèm lan: “Epi w ap plonje yo anba dlo a” (3 Nefi 11:26).

Anpil moun kwè ke revelasyon te fini avèk Bib la menmsi Bib la limenm se yon temwayaj sou modèl revelasyon Bondye pandan plis pase 4.000 ane egzistans lèzòm. Men yon doktrin enkòrèk tankou sa a se tankou yon domino yo deplase ki lakoz chit tout lòt domino yo oubyen, nan ka sa a, chit doktrin kòrèk yo. Yon kwayans ke revelasyon Bondye fini ka lakoz chit doktrin ki di ke Bondye se menm ‘ayè, jodia, ak pou tout tan an’ (Mòmòn 9:9); e sa lakoz chit doktrin Amòs te anseye a ki di ke: “Konsa tou, ou mèt sèten, Senyè a p ap janm fè anyen sa li pa fè pwofèt yo, moun k ap sèvi l yo, konnen” (Amòs 3:7); epi sa lakoz chit doktrin ki di ke “Bondye pa refize pèsonn” nan (Travay 10:34), ki vle di, li pale avèk tout moun nan tout epòk. Men erezman, Liv Mòmòn an rekonfime verite bibliik konsènan revelasyon kontini an:

“Epi , yon fwa ankò, m ap pale avèk nou menm ki nye revelasyon Bondye yo, e ki di yo pase, pa gen revelasyon, ...

Èske nou pa li Bondye se menm ayè, jodia, epi pou tout tan” (Mòmmon 9:7, 9).

Otremandi, si Bondye, ki enchanjab, te pale nan ansyen tan yo se menmjan tou l ap pale nan tan modèn yo.

Lis konfimasyon ak klarifikasyon doktrinal la kontinye san rete, men okenn pa pi pisan ni pi afektan pase pil diskou ki Liv Mòmmon an konsènan Ekspyasyon Jezikri a. Èske nou ta renmen konfime nan nanm nou yon temwayaj enkontestab ki di ke Sovè a te desann anba peche nou yo e ke pa gen okenn peche, ni sitiyasyon nan kondisyon mòtèl la ki andeyò limit mizerikòd Ekspyasyon L lan, ke pou chak lit nou yo Li gen yon remèd ki gen yon pouvwa gerizon siperyè? Enben, li Liv Mòmmon an. L ap anseye nou e L ap temwaye nou ke Ekspyasyon Kris la enfini paske li anglobe, kontoune, ak kouvri chak ti feblès mòtèl lòm genyen. Se poutèt sa pwofèt Mòmmon te deklare: “Nou dwe gen esperans nan Ekspyasyon Kris la” (Mowoni 7:41).

Se pa etonan ke Liv Mòmmon an pwoklame bravman: “E si nou kwè nan Kris la, n ap kwè pawòl sa yo, paske yo se pawòl Kris la” (2 Nefi 33:10).

Ansanm avèk Bib la, Liv Mòmmon an se yon temwayaj endispansab doktrin Kris la ak divinite Li. Ansanm avèk Bib la, “li anseye tout moun pou yo fè byen” (2 Nefi 33:10). Epi ansanm ak Bib la, li pote ban nou: “Yon sèl Senyè, yon sèl lafwa, yon sèl batèm.” Se poutèt sa, Liv Mòmmon an si enpòtan konsa nan lavi nou.

Sa gen kèke ane mwen te asiste yon nan sèvis adorasyon nan Toronto, Canada. Sete yon jènfi 14 zan ki tap fè yon diskou. Li te di ke l tap pale sou relijyon avèk youn nan zanmi l yo nan lekòl li. Zanmi l lan te di l: “Ki relijyon w?”

Li te reponn, “Legliz Jezikri pou Sen Dènnye Jou yo, oswa Mòmmon.”

Zanmi l lan te reponn, “Mwen konnen Legliz sa a, mwen konnen li pa vrè.”

Li te reponn: “Kijan w fè konn sa?”

Zanmi l lan te reponn: “Paske m te fè rechèch sou li.”

“Èske w te li Liv Mòmon an?”

Repons lan se te: “Non, mwen pa li l.”

Aprè sa, ti demwazèl la te reponn: “Enben, ou pat fè rechèch sou Legliz mwen an paske mwen li chak grenn paj Liv Mòman an e mwen konnen li vrè.”

Mwenmenm tou, mwen li chak grenn paj nan Liv Mòman an plizyè fwa, e mwen rann temwayaj solanèl, menmjan ak gran-gran-papa m, ke li soti nan Bondye. Nan non Jezikri. Amèn.

Nòt

1. Willard Richards, in LeGrand Richards, *A Marvelous Work and a Wonder*, ed. rev. (1972), 81, 82.
2. C. S. Lewis, *Mere Christianity* (1952), 40--41.